

晚

晴

移

詩

匯

晚晴箋詩匯卷五十七目錄

嵇曾筠

十一首

吳士玉

三首

彭維新

十六首

俞兆晟

一首

方苞

一首

余甸

二首

李鍾峩

一首

王思訓

四首

陳厚耀

一首

王樹

一首

莊令輿

三首

宮鴻厯

五首

喬崇烈

六首

劉青藜

三首

鄭任鑰

一首

丁士一

二首

魏嶮

二首

陳觀永

二首

方燦如

三首

段巘生

二首

何深

一首

王萃

九首

張謙宜 七首

張璨 二首

汪繼燦 一首

吳麟 四首

戴寅 三首

許湜 二首

覺羅固興額 一首

趙熊詔 六首

繆沅 十一首

戴名世 二首

趙國麟 四首

阿克敦 七首

呂謙恆 六首

呂耀曾 一首

呂憲曾 一首

方式濟 四首

何世璣 二首

芮復傳 三首

周人龍 一首

晚晴綵詩匯卷五十七

徐世昌

嵇曾筠字松友號禮齋無錫人康熙丙戌進士官至文

華殿大學士加太子太傅諡文敏有師善堂詩集

詩話文敏父永仁以諸生佐范忠貞幕殉耿逆之難
時文敏方七歲母楊太夫人教之成立生平功業治
水為大著有河防奏議常用引河殺險之法其黃河
詩云地勢高卑有定形疏之則泰壅之否水性平險
無常情逆之則怒順之喜蓋洞究禹貢導山導水之
旨而一衷於孟子之行所無事所謂以經術濟世用
者撫浙時有旨照李衛例改為浙江總督異數也晚
年刻意為詩冬夜云睡去尋詩夢不甯偶成云新詩
斟酌夢中吟自箴云老愛吟詩句
不佳與幕友翁朗夫唱和為多

寄天津范自牧觀察

悵望津門鴈不歸尺書迢遞雪霏微每懷甘旨塵生釜豈
為行吟帶減圍天地有情人落寞雲霄無路夢依稀山公

應念遺孤幼寄與愁心問繡衣

有母常看獨倚闥顯揚無計愧何如南溟鶴唳歸華表吳
地冰霜逼歲除儻憶通門重啟事定教伏闕上遺書忠魂
已化萋宏碧雪涕君恩浩蕩初

五臺山

昔人一攬五臺勝謂可不須五嶽游把詩令我輒神往春
裝欲發仍旬留那知山靈有深眷銜命太原償此願見山
已自開心顏况復驅車到天半摩霄跨漢何從寵呼吸直
與精靈通疑是媧皇此煉石化作五朵青芙蓉聞說東臺
特奇妙拾級先登縱遐眺夜半湧出硃砂丸海外天雞猶
未叫山僧復導過西臺舉頭正喜鴻濛開陰晴涼燠變俄
頃颯然萬里邊風來遙指南臺高幾許蹈虛躡險如霞舉

上方歷歷見星辰下界冥冥自風雨欲往北臺更飄瞥分
明引入水晶窟陰厓高疊萬古冰幽澗長流千歲雪中臺
宛在山中央云是文殊舊道場馴虎何曾避行客伏龍猶
自依空王飛泉宛轉當檐落注入清池長不涸鏡中大可
印禪心惟見一泓開澹漠小憩剛逢梵課餘妙香冉冉飄
衣裾到此能令眾緣息祇有夙好猶難除因之餘勇更一
鼓直上蓮花嶺頭坐兩九日月足底生百道煙霞腰下裹
一峯萬狀難具論諸山環侍猶兒孫置身合在最高頂俯
瞰一氣渾無垠假令獨往心不猛奇勝何由得全領乃知
萬事須造巔賴得茲游發深省竭來幸值公務閒閒情暫
寄水石間幽吟頗得清淨理遐賞適在清涼山卻爲王程
難久住搖鞭又入紅塵去回看一片出山雲不識爲霖向

何處

題任城太白酒樓

子儀起汾陽先生可以退季真歸鑑曲先生可以醉只有
先生是獨醒故向長安酒家睡縱飲斯樓亦偶然後之好
事爭流傳我來何處呼謫仙山空水冷月在天

昭陽湖

夜分催振柁遂達昭陽湖如行菱鏡中澹蕩涵菰蒲跳波
月一丸散作千明珠天水浩相接湛然織翳無五千五百
頃一色琉璃鋪空際下漁舟點點疑飛鳧倚舷獨凝眺心
曠神爲舒我嘗考圖誌信美惟此區滕薛旣合流黃運仍
分趨詎徒資蓄洩兼可濟輓輸所嗟水鄉窪民力思其蘇
幸逢清晏日濺澤長涵濡九重殷軫念衽席霑宸謨

韓蘇祠

有唐文章雄獨推韓退之深得六經蘊能起八代衰才名滿天下宰執猶未知乃依徐州牧幕下常棲遲建封雖薦達參佐何能爲奮筆三上書鳴號固不辭於君則敢諫於友亦善規平生凜名義實爲百世師

繼起得髯蘇早歲亦不偶晚迺持一麾幡然重出守是時黃流溢諸吏咸掣肘公獨能制之狂瀾障以手欲弭鯨鯢災甘爲牛馬走水患乃立平前此實未有天子嘉其功上表特稱壽至今被遺澤民物慶康阜跡與昌黎殊文行均不朽我來叢祠下再拜酌杯酒俯仰千載間二賢堪尙友

鎮海塔

海色微茫金碧浮屹如砥柱鎮洪流佛光炳耀馴龍藏仙

觀高寒俯堞樓新堰萬尋平野障遠山一髮暮潮秋諸天
賴倚崇墉久絕勝東坡玉帶留塔峙海濱屢被潮噬欲圯
今築石隄拱護遂得永鎮

東

赭山

滄江括地維瀛海包天根赭山駕長虹校與他山尊秦王
昔驅石一一皆東奔鞭此不爲動骨立餘殷痕祇今數千
年獨喜巋然存潮汐靡不由終古相吐吞伊余董疏導出
入宜窮源拏舟涉洪波周歷驚心魂幸使井里安夷險非
所論努力凌絕頂列宿高可捫大江自西來潮勢互飛翻
坡陀觸潑澗水石聲相喧於茲悟治理扼要先蛟門登頓
跨龍脊不覺煙嵐昏

龕山

龕山亦秀拔遙與赭山對
兩山東一水江海爲之匯
是日南大壘衆流貫乎內
不知自何年滄桑迭相代
莽莽連平沙揚塵應已再
陸陵蔽桑麻水道幾茫昧
我來一延覽早已得其槩
山徑雖不深綿延足塘埭
浩浩日夕流誰復患壅潰
龍飛鳳舞交峯峯無向背
溜乃趨中泓四野都霑漑
曩時慶安流是處歌康乂
何當挽天吳包舉憑坤載

重陽

秋老西風滯雨聲
今朝重九報新晴
曉霞海色明
吳甸飛翠嵐
光入越城百尺凭
樓堪送雁
數竿戛玉勝
吹笙紫萸黃菊
何心覓香稻連疇足
晚成

吳士玉字荆山吳縣人康熙丙戌進士改庶吉士授編

修官至禮部尙書諡文恪有吹劍集蘭藻堂集

詩話宋慢堂撫吳時刻江左十五子詩以年齒為次
 日王方若式丹吳山綸廷楨宮友鹿鴻歷徐大臨昂
 發錢亮工名世張日容大受管青村榆顧俠君嗣立
 李百藥必恆蔣揚孫廷錫繆湘芷沅王麟照圖炳徐
 學人永宣郭于宮元鈺而荆山列第八其中名位顯
 達者南沙相國之外則推荆山其詩雍容大雅瓣香
 在蘇陸之問

玉帶生歌奉和漫堂先生先生原序云楊鐵崖有七

管胡琴古甕與硯並己為七六客各錫以嘉名而
 硯舊寶於文丞相紫質玉紋所謂玉帶生也丞相
 殉國硯歸謝泉羽轉歸鐵崖鐵崖作志命門
 生張憲作玉帶生歌余幸觀奇寶亦贈以歌

中丞好古攄幽情示我寶硯光晶瑩紫衣通身腰橫白云
 是景炎故物玉帶生曾游鐵門翻白雪向陪皋羽號冬青
 結契最是文山早揮灑神筆凌霄崢銘錫貫珠四十四至
 今的爍炳日星棐几摩挲追往事感槩鬱律何能平或言
 信國當年初射策生也即隨顧盼趨承明萬言一掃盡龜

鑑鐵肝石膽生風稜轉瞬煙塵昏頓洞生同顛躋哀零丁
丹心磨礪句不滅正氣磅礴歌吞聲天崩地塌壯士死但
聞西臺擊竹風悲鳴可憐宋社淪海水片石乃有神靈憑
鼎遷者三載五百貞質不毀堪嗟矜英英紫玉暈痕透有
如白虹貫日昭精誠仰止孔石孔子遺視陋桑鐵笛管之族豈
其朋焦氏秋況出姦相琴爲賈似道故物蘇龔那混申椒馨彼哉
客寮並數七嘈雜非偶徒虛名豈如我公位置肅左圖右
史箋遺經濡翰端可幹元化作歌雅欲親典型公歌突過
玉筍作爲生寫真垂千齡

石屏歌爲商邱先生作

羣峯奔雲湧座隅下有煙艇浮江湖是何淋漓足元氣得
非米家海岳圖細看乃是渾成一片石天然妙迹非人摹

昔聞巧匠斲山骨未聞山水粉繪生石膚若云造物作狡
獠卻愁混沌鑿死將何如萬里煙雲藏咫尺壁開天地超
寰區漁舟箇箇齊盪槩煙波雲岫聊相娛我思米顛工畫
兼嗜石整冠再拜以丈呼石之嶙峋足以壯筆勢畫之奔
峭與石爭盤紆石癖畫巧兩不減畫留石上永永成形模
君不見歐公當年石月屏子美放歌窮虛無又不見孤松
溟濛石屏上子瞻長句搜根株今公茲屏亦奇絕愧無大
手如兩蘇

上韜光望錢唐江

拔雲緣危磴邈若陵風飛回首失紺宇聳身但翠微連天
起古煙萬竹相因依碧色望不盡步步娛清暉絕境天可
捫訇然開巖扉遂登縹緲樓浩歌縱遐睎江光搖空闊潮

勢吹裳衣精神忽飛揚八極從指揮

彭維新字石原茶陵人康熙丙戌進士改庶吉士授檢討累官協辦大學士管理戶部坐事免起授左都御

史有墨香閣集

詩話茶陵自李懷麓以文章相業蔚為有明一代正宗數百年來無異詞州里後生迭相摹擬至石原始以文采表見於世論其名位固未能逮規模亦稍狹隘然具體而微不失先正軌範

次韻鄭魚門秋夕書感

午夜涼颺生秋聲驚坐寐月色盈中庭桐陰減半砌志士感時節繁憂浩無際碧宇河漢橫寥廓絕纖翳太虛本澄明塵勞徒做做人心有天游胡為自膠戾

蕢酒不盡飲旅顏成半酡世味閒愈淡夜吟秋更多蟋蟀無意緒苦效商聲歌我聽猶絲管翻賴蠲宿疴篆煙靜不

散井水寒無波燭光熒斐几聖籍紛駢羅

碧泉巖

茲崖韞高德不欲矜有餘盈腹貯乳水纖罇鳴珮琚夏潤
冬不縮點滴均數疏一綫下雲竇匯入芙蓉渠靈巖前沿鏡澄

天在水中無驚餌魚曾洗仙藥鼎時濺游人裾綠苔有新
意丹壁無宿淤窄仄足容膝可以讀吾書穉松匝戢戢好
風來徐徐茶鑪近挹取小啜塵慮祛流潤歷千劫應有神
物居何當作霖雨及時起焦枯時苦旱

春游雜吟次趙秋谷前輩韻

洄寒蘊元化釀此無邊春光風洗黯黥老物呈鮮新遙山
突入戶半壁青嶙峋晴空雲靄靄碧沼波鱗鱗樂意到魚
鳥飛泳羣相親農事以時舉錢罇亦已陳林閒鳴社鼓陌

上扶醉人昇平太和徧何處容鬱堦

洗眼待春歸一療詩才餒翻醉看花觴宿醒連不解紅紫
紛迷離到處空貽駭何限輪蹄塵誤逐繁縟彩冲漠司化
機疇其覓真宰

歲晚冰雪攢眾卉泯無迹一自春風來是處草痕碧桃杏
矜豔陽倚笑東郊陌習經寒與暄獨有舊松柏甘避踏花
塵雲煙共朝夕

繁枝簇蓓蕾東風爲吹開爛漫會幾時片片飛綠苔開落
皆東風昧者紛疑猜芳時異搖落胡爲有隳摧君看蒼巖
樹榮悴何預哉

三月春浩浩楊柳披清池依依綴柔葉裊裊垂長絲游人
就帷幄詞客吟葳蕤不願蒙顧盼願勿攀折之攀折亦易

盡來歲無好枝

繁英已繽紛花風未吹棟今歲桐葉增化工不肯倦密樹
百啣鶯畫梁雙歸燕富兒羅葦羶閉戶開廣宴獨有靜觀
人早識東風面筇枝收將歸陽春在吟卷

游峽山飛來寺

澗草霑泥澀頻疑過鹿羣中峯時一雨初地更層雲磴仄
藤根護崖開樹影分香臺行漸近疏磬隔林聞

晉水源次汪文升前輩題難老泉韻

石根微漾散輕漪驀澗奔瀧勢絕奇萬斛脰匄工吐納亦
激勢如酌突泉者一泓清淺受鬚眉機春處處飈輪激水耨村村
地脈移流入汾河便泥滓殷勤看取出山時

題青墩卷

秦世瑛山東人世為農其祖備耕塞上為
豪家所害而匿其尸瑛父尋訪豪家及徵

甘心遁歸憤惋以歿遺言父骸不歸已終不葬世
瑛感泣赴塞百計廉祖骸數千里負歸與父共葬
青墩距祖歿時已六十年矣一時士大夫義之為
詩歌紀其事曰青墩純孝卷衍聖公孔毓沂為作
傳屬余題之

一束枯骸盡淚痕崎嶇招得未歸魂北邙高冢麒麟卧輸
爾農家有子孫

泉下團圞宿恨蠲墓門夜月罷嗁鵑卽今寒食青墩路水
木迷濛六十年

贈姜漁臺

漁臺名璜自云蜀人嗜酒放曠詩效李昌

幣求畫久不與使人索之值醉麾幣罵使還其絹
金吾怒欲中以事漁臺遁走浙東入雁宕山籍貫
姓名更易無定其畫或經年不作酒後揮
灑輒十數紙著墨不多皆活潑有奇氣

累月經年慳一畫畫成著墨卻無多由來能事參元化山
吐雲嵐水湧波

敲簷短壁歎風雷攝得龍湫雁蕩來願虎頭廚防賺取題

詩自詭贈漁臺

作龍雁圖甚奇恐人攫取題詩其上詭署姜璜贈漁臺

曾聞還絹惱金吾亡命東甌幾載逋畢竟恕先難免俗富人猶得放鳶圖

俞兆晟字叔穎海鹽人康熙丙戌進士改庶吉士官至

戶部侍郎

吳宮曲

館娃春深晝寂寂美人列坐彈瑤瑟自裁白紵六銖衣回
雪流風侍君側清歌珠串杳入雲梁塵不動花繽紛繁絃
急管停復作當筵催進泥金裙軍聲殷殷來攜李犀甲晶
瑩照秋水破楚門東鐵騎圍君王夜醉扶不起白紵歌殘
事已非洞庭漁唱雨霏霏至今城上烏嘯急猶聽吳孃夜

搗衣

方苞字靈皋一字鳳九號望溪桐城人康熙丙戌進士

歷官內閣學士兼禮部侍郎銜

詩話桐城古文家海峯惜抱詩並傑出他如王梅生劉孟塗方植之姚實甫諸人雖所造各有深淺皆傳作斐然望溪嘗曰童時侍先君子與錢杜諸先生以詩相唱和欲竊效焉先君子戒曰是雖小道非盡心以終世不能企其成而耗少壯有用之心力非躬自薄乎遂絕意於詩見鳴青山人詩序

陶淵明

陶潛經世人志不關沮溺觀其詠春蠶自視儕禹稷東皋日荷鋤憂勤同運甓春風沂水情孔顏宜命席

余甸初名祖訓字仲敏號田生南平籍福清人康熙丙

戌進士歷官順天府丞有千卷樓集

詩話田生清介絕俗居官有風節與方望溪雷翠庭相砥礪工詩古文辭兼精篆隸真行並有法度

冒雨過連雲棧

辛苦蠶叢道夷猶作短歌
雨從山半落雲趁剝根過
出地三千丈違天尺五多
攜來謝眺句搔首問如何

蜀宮瓦

絕代繁華地深秋細雨天
宮門餘片瓦不忍憶當年

李鍾我字雪原通江人康熙丙戌進士改庶吉士授檢

討歷官太常寺少卿

詩話舊例館選不問省分邊遠每多遺闕雍正初雪
原上疏言康熙四十五年以後每科各省皆有庶吉
士元年癸卯闕漢軍及河南四川二年甲辰闕蒙古
及山西河南陝西湖南四川廣東西雲貴諸省請廣
儲才無遺邊遠下部議行自是每科
各省皆有庶吉士實雪原疏啟之也

巫峽

巫峽天下險崖陰水氣昏猿嗥雲外樹客斷雨中魂
神女

靈旗動騷人豔賦存無窮懷古意獨自向江村

王思訓字疇五號永齋昆明人康熙丙戌進士改庶吉

士授編修歷官侍讀有見山樓集

詩話永齋留意鄉州文獻嘗輯滇乘二十五卷遺聞
逸事時時見於詩篇傷永明王父子則有五華山歌
弔黔國公沐天波則有咒水歌怒天波妻焦氏則有
金井庵行時有揚娥者為張氏婦兩家皆世為黔府
護衛娥美而善技擊天波殉國娥夫道死從家人歸
恨吳三桂欲報仇苦不得近乃賣酒城西觀妝當鑪
吳部曲爭過飲相與為惡譴娥執其尤無狀者提投
狗寶沃以沸湯則羣起擊娥娥一奮臂眾皆披靡使
吳得聞將納之娥忽中寒疾死永齋過酒肆舊址賦
當鑪曲其事未見於他書永齋去其時未遠親憑弔
其地當非妄言也

山居

本非逃世者胡以碧山藏居愛愚為谷行殊智作曩野花
春澗落流水石橋香勿笑躬耕拙人情澹泊長

易隆別故人

別淚多於酒尊前莫易彈恐傷游子意不盡故人歡塞雁
呼秋旅江楓倚暮寒來朝遠凝望雲樹雨漫漫

七月七日登盤龍山蓮峯閣

鐵騎金戈失翠邱誰家笑語在鍼樓浮雲身世三年淚落
日關河百戰秋天外不來青鳥使沼邊空憶赤龍游欲消
旅恨憑香閣一水盈盈隔女牛

懷化驛晚行

陰逼千山暝林深覓路遙疏鐙疑野戍殘雪辨危橋驛僻
卒多悍途長僕易驕夜中搔短髮愧殺霍嫫姚

陳厚耀字泗源泰州人康熙丙戌進士由中書厯官左

諭德兼修撰

詩話泗源受算學於梅勿庵以李文貞薦入直蒙養齋親承聖祖指授其學益進借梅文穆同修算學諸書書成改官翰林恩禮甚渥所傳詩多應制之作

熱河趵突泉

由來鑿飲頌康衢誰道甘泉彘勝區萬派寒潮飛匹練半天花雨灑明珠膏流海外尋源處清在人間發軔初此地風雲開北極靈根玉窟擁皇圖

王澍字翦林號虛舟又號竹雲金壇人康熙壬辰進士

改庶吉士授編修歷官吏部員外郎

詩話虛舟由編修遷給諫疏爭六科隸都察院作旨改官餘曹歸遂不出書法名家畢生致力四體並工單谿論書與其宗旨不同獨取其篆書蓋不免門戶之見傳詩不多要是傳語

題陸卷阿濠梁秋水圖

蝴蝶春風夢濠梁秋水圖諦觀非外物阿堵是真吾詩境

通三昧漁家共五湖蘆花已頭白林際鳥相呼

莊令輿字蓀服號阮尊武進人康熙丙戌進士改庶吉
士授編修有雙松晚翠樓詩

曉晴示同寓諸子

碧空片片雨雲輕日射疏櫺曙色明三徑曉晴飛蝶影六
街春暝賣花聲經營蘭圃兼蔬圃料理茶鐺及酒鐺賴有
素心晨夕共天涯風景倍關情

次韻寄題友人別業

背郭軒窗面碧波琴臺書幌幾經過能文事業窮司馬種
樹生涯老橐駝畫舫風高颿影疾綠陰春暝鳥聲多
塵裏躡棲客空記臨流聽棹歌

游廢園

層層石磴古樓臺臺外雙扉面水開池柳晚風翻碧浪畫
牆秋雨點蒼苔蛛絲細網縈花徑燕壘殘泥墮酒杯剩有
繁華舊時夢疏松仍奏管絃來

宮鴻厯字友鹿泰州人康熙丙戌進士改庶吉士授編
修有恕堂詩

小忽雷歌

文梓巧琢張鷟弦鳳皇曲項宮錦纏紫綰葳蕤搭左肩大
音函胡小折廉發響倏忽雷闐闐韓公進自興元年玉釵
紅袖人五千忽雷入隊樂部全興元天子方播遷瓊林大
盈流布泉有司隨例進羨錢長蛇封豕橫八埏猶敕大官
開玳筵文孫累葉更蔥然巨璫次第司天權太和歲終何
顛連紫宸班定臣約前奏曰左仗丹榴然甘露凝結如珠

圓臣訓鞠歷拜舞虔幕兵未出戶已穿輓輿六尺諸璫牽
臣行餘璠節鉞專將士喘縮尻脊卷宮門飛埃橫紫煙女
官執樂清淚漣忽雷寂莫歸市廛一千年後誰留傳祕器
眞屨空覃研無乃燕石誇瑤璿我時力耕研北田癖古炙
穀談夷堅泚筆聊賦忽雷篇

秀野堂讌集時俠君止酒以詩先之

手持秀野一帙詩讀之我猶屢解頤而沉握手共君語絕
口不飲安以爲君心玉節貫霜立君詩鐵騎空壁馳長安
與君隔巷住橫行闊視誰能羈縱不車前戴畚鍤亦要車
後懸鷗夷手揮羣豕舉大杓上頓入務尤恢奇竭來相戒
欲止酒云此作病非所宜美疾豈因濁醪劇長身或恐書
淫羸君鉤物情亦太盡更緣綺語雕肝脾好辭工書子厚

癖易去二病真良規脫君不輟洛下詠亦勿遽怒杯中螭
明朝酒星聚南國待君手舉弧螯旗我觀酒人百態出意
行投足無津涯笑視座中不飲客反用醉語相嘲詆正如
狂泉飲狂國都不自覺形支離其君不飲得無恙轉被炙
灼求瘼胼座中主客盡龍虎千鍾百榼甯忍辭我今興闕
若脫髮滿梳不復能收持久判酒徒嘲小戶聊用壯語前
致師

過德州作

清河三日暫淹留又曳柴車向貝州一路黍禾迷澤雉半
林桑柘翳山鳩馬頭北走邯鄲道鶴首南通漢沔舟厭次
祠堂千古在當年金馬只俳優

削平魏瑞墓爲張蘧若侍御賦

龜鼎龍蛇歲韶瑞虺蜮儔姦能迷鹿馬心肯混鈴駟稂莠
眞非類溝渟止下流初爲中謁者旋典大長秋保母黃羅
服監奴綠臂鞬高明侯覽宅艤旣李膺舟遂喪澄清志誰
憐草莽憂艱危逢夏馥倉卒問朱游北寺關三木西園拜
五侯刊章收月旦投匭犯星郵鉤黨秋荼似爰書夏日侔
噉人韓鳳憤階亂豎刁優左仗無甘露南牙有敗猶刀鎚
憑頰舌撈楚代虔劉桎梏甘陵學銀鐙楚國囚摧殘登鬼
錄殄瘁盡人謀笑看三台坼心甘萬姓仇不知百年後何
意一抔留馬鬣西山麓龜趺大道周胡爲亂勝國竟得首
高邱白日張星耀青春御史游乃心存義憤抗志見風猷
伐惡追千劫誅奸到九幽豐碑立拈擊狐豕旋鉏穰骨朽
猶堪戮魂飄不敢嗽當年六君子一笑擲吳鉤

龍游徐偃王廟

拘儒談往事百鳥同一味盡信則無書故牒何足究穆滿
方耄荒四海斃在疚纍囚盈狂狴飛龍躍天廡當時徐偃
王坎穽引手救諸侯盡東來玉帛已輻輳德化亦旣闡大
業偶不就後儒肆刻論竟遺萬年臭昔人更有說要足訂
差謬殷扈以義亡徐偃以仁覆此論吾所憑名實正相副
周宣讐淮夷自將耀戈冑當時豈乏材不敢任指嗾可知
徐方民歷久不忘舊功罪三古前是非千禩後聃董異見
聞竹冊有遺漏子長生未晚文獻有所授世家編田齊猶
有宰我陋何況今之人毀譽迭相構

喬崇烈字無功寶應人康熙丙戌進士改庶吉士有學

齋詩集

阮芸臺曰無功居父喪每泣則庭烏爲下禹鴻臚之鼎爲畫餉烏圖朱檢討葬尊題詩三章

北河

北河之水來何方四顧白浪紛茫茫山崖擺石怒雷吼波
臣肆毒民生戕可憐草木環巨浸汙者旣沒隆者黃老農
道邊袖手泣滯穗那得希除芒邛邛黔首築隄集鋤各
致羊頭鋼喧填往來不得息略如巢燕銜泥忙秋成儻可
得一飽此日敢惜胝胼瘡我來自京歸南井綠蒲十幅安
吳檣濤翻岸斷不可辨竹索或曳人垣牆版扉土屋半在
水居人儻食空囊囊我家苦憶淮黃側西兼白馬東廣洋
年年稻田長荇藻以魚作蔬菱作糧比聞五旬雨不歇對
此能勿心煩傷側聞聖人重人事疏淪有道誰其商

水帶子歌和竹垞先生

淮陰市門頭白翁壁挂一物環無終象則顰厲扎肖空枵
然而游謹市蒙試叩是何器翁言厥用壺樽同御之不慮
投驚深我昔浮大河畏作惡劇跋扈風一舟掀簸寡力不
得施去砮爾崩濤滅頂瞽若瞽與聾顛倒上下間方寸餘
惺忪恍惚一擲再擲落貝闕臨綃宮親聞豨京號令龜使
驅羊工涼波一勺入我口泠泠直下黃庭中覆舟如覆盂
摸索忽得逢攀援而出幸不死距今十有七載更得稱鳧
公當時自恨致此晚令我水底從噉喁可知巖壑平生屬
吳越揚子茫茫戒朝發錢江潮汐尤怖人往往臨之羨翩
鶻況是我里門歲歲併受黃淮吞飢驅散者日已眾燕雀
何以籌生存老翁索錢才幾貫我幸得之肯以三公換幾
回滄海歎橫流南北東西鎮相伴公無渡河公渡河曩來

覆溺何其多從此致用應無訛吾師長水先生新作歌

秀野草堂觀鐙歌

秀野池閣間邱東千跗萬萼春煙籠主人弄筆追清雄好
客不道陳元龍鄧尉花發山山穠好事千里千人從包家
費家河盡塞四方併跡幾多卿主人辨物邀羣入山堂日
吉謀清悰是時新正且未破上元雖過鐙猶紅周遮何止
樹萬叢枝枝綴蠟緣春蟲碧天沈沈未上月青梢濯濯初
彌風池塘冰泮新水灑遠近影落無邊中林虧竹蔽各窈
窕疏者得密密者重不夜亭邊聽填咽銀花火樹何搖溶
拔地一塔並兩峯黑雲半截垂天虹光燄或竊舍利顥雷
峯不待南屏鐘葡萄一架製最工百千萃實纏樞縱長安
擔頭笑瑣細令我遠憶浮槎翁楚鞭戛擊聲磨空動地鼓

愕漁陽攻旃幢旌節徧山出三里霧合昏穹窿哀絲豪竹

樂未終化人城與僊山通飈車電轂如有逢妙嚴仿佛來

香蹤

妙嚴梁武帝女遺墓在秀野園內

紫霞之衣金綃幘並桃冠子偏髻

濃白咽紅頰青青瞳臨水隔花小隊恭五花寂寞嫌幽宮
青蚪躍躍白鳳雍探珠拾羽共游衍篤蓐一發雲已封厭
厭夜半星橫縱主人與客歡無窮百瓶卧地拇折衝接羅
倒著扶奚董明朝更約探梅去萬山寒玉含瓏鬆

移居留別長椿主人

春風生院草木葉冷霜天一一去來跡依依二十年與君
同季世分手惜流川更下何時榻重尋未了緣

移居

移居從近市差覺與官宜漏水聽毋誤磚花闕免遲鄰喧

沽酒肆夢隔護巢枝微祿慚迎母秋風冷鬢絲

奉贈林非聞前輩

明癸未進士

牆東有何好委身其間者往往有人在歲月定瀟灑我聞
萬物若芻狗何物一官真敝帚乾坤清氣本生人橫目二
足甯相負四明山雪竇水芒屨竹杖追黃綺冬一裘夏一
葛芝房松鬣無飢渴當時海水變桑田今見文思帝則天
手拋柏子高千尺回首優游六十年

劉青藜字太乙襄城人康熙丙戌進士改庶吉士有高
陽山人集

詩話太乙有寄弟詩云今生不盡團
團樂那有來生未了因誦者泣下

茶至從友人索仙翁觀乳泉因憶舊游

環襄山者八槎牙羅羽衛高陽尤挺拔鵬褭丁戊位傳聞

葛孝先修真此焉憩丹竈冷松崖雙井留石碣憶昔踏青
鞋赤壁蘇游歲霜飛曠野清雲斷長空霽同行八九人其
六余兄弟盤回陟層巒紫翠侵衣袂黃冠導客行指點話
遺事前臨古殿腳瞥眼泉溶滴垂垂滴復凝脈縷殊微細
稍下匯爲池盈盈侵階砌其色如牛乳其紋乃蟬翅甘露
脣未沾掬來知彷彿旋呼活火煎山風吹蘭蕙歎息謂同
人此物信靈異陸羽劉伯芻品目胡遺棄茫茫天壤間何
處無珍祕物必待人傳不然終幽翳舉醜賀山靈發潛快
吾輩誓將謝塵鞿把茅向此地回頭已十年屐齒誰爲泥
林壑夢舊游猿鶴空怨唳有客願渚來紫筍翦籠遺枯腸
久未搜蟹眼急欲試雖無調水符猶識玉洞味君家傍山
根挹注頗容易願言煩樵青軍持爲我寄

送伯章南歸

帝城春雨日霏霏孤雁離羣獨自飛
最是客中腸斷處車輪聲盡掩禪扉

汲縣贈同年楊木天

楊洛人

不上天津舊酒樓五年常憶董糟邱
竹書豕畔重攜手暮雨嗁鶻無限愁

鄭任鑰字維啟號魚門侯官人康熙丙戌進士改庶吉士授編修官至湖北巡撫有非輦軒橐

春蠶詞

蠶月人家愛晴旭紙筐分葉聲滿屋
三眠過後桑樹稀稱來銀繭纒爲絲
山村日午緯車響榆柳陰陰煙火遲
憶昔民間累苛派新絲二月長先賣
近年兒女有完襦急公更

足償私債艱難衣食在農桑年年拜祭馬頭孃不辭小婦
閨中苦願作山龍藻火裳

丁士一字鶚薦號河峯日照人康熙丙戌進士歷官江
西布政使

立春後泛舟山堂尋陳肖坡學博故居

舊隱今何處幽尋蕩槩行人家多近水春樹已藏鶯石淨
塵無迹溪澗瀑有聲桃源深不見遙望白雲生

下水船次壁間韻

船駛隨流水篙師鎮日閒灘回疑縮地帆轉欲移山過眼
迷村舍乘風壯客顏計程淮北近次第翦江還

魏嶠字雲岑號念泉南樂人康熙丙戌進士官錢塘知

縣有鋤經山房橐且齋草

答吉敬先

尺素勞相問悠悠感別離關河爲客日風雨落花時儒術
謀生拙禪機與性宜買山常有志誰寄草堂貲

同郝元鶴信江二丈訪孫山人

媿此塵中人來訪山中客相見了無言笑指春山色

陳觀永字安次陽城人康熙丙戌進士官濬縣知縣有

恤緯集

立秋日同漁沁若水麓亭升巖池上小飲徹夜

開樽呼酒伴爲愛此亭幽風雨驅殘暑乾坤動早秋鄉心
分近遠雁影信沈浮更漏山城罷清商引棹謳

白露日歸途卽目

零露灑灑白空囊草草歸野花能自笑秋葉未全稀雲斂

千山出風高一雁飛且舒蕭散意覓酒叩村扉

方黎如字文朝號樸山淳安人康熙丙戌進士官豐潤

知縣有集虛齋集

詩話樸山博聞強記尤長於三禮乾隆初舉博學鴻詞辭不就嗣又以經學薦復不應世爭傳其制舉文詩用宋法組織致工風韻遠出亦足名家

得蔣三湘帆札

直似家書到歡持抵萬金七年生別夢千里故人心絳帳

思疇昔曲阜顏師青袍歎陸沈頭顱如我輩慚負寢門深

書家信後

解弢墮袞幾温涼俎豆深慚畏壘鄉投筆便如書已達寄

郵翻覺事多忘貧家苦趣多男子樂府傷心病婦行何事

最牽魂夢在劬勞母氏倩扶將

王子元日

爐燒楮袖榜桃符奈有窮愁歲不除坐守庚申憐影隻重
來甲子當生初甕餘骨醉輪困蟹盤薦鱗鮮潑刺魚隨例
一杯婪尾酒案頭拋捲讀殘書

段獻生字相山號柱湖常甯人康熙丙戌進士官廣東

新安知縣有柱湖詩草

詩話柱湖少即負才吳三桂自號周於衡州試士道
柱湖入試不應試官命屬對日附于大邑周柱湖應
日以待天下清試官異之亦不以爲罪也與陳滄洲
友善滄洲得罪屬其二子焉事白佐滄洲治河滄洲
嘗贈以詩曰車經九折途原險口記三
緘道自眞後出爲吏卒坐言事論罷

九日泊舟朱亭

綠淨湘江水歸帆客沉消重陽誰送酒九日不登高季子
金將盡阿咸興頗豪遙知音信絕老父念波濤

和滄洲韻

不須大藥駐朱顏，膂力方剛鬢未斑。
塞外草肥誰牧馬，燕然天遠欲銘山。
應思我輩分陰惜，豈覓人生半日閒。
壯士功成身始退，河清海宴待君還。

何深字頃波，連平人。康熙丙戌進士官長沙知縣，有晴窗偶鈔。

秋日游干佛山

晚煙城郭合僧磬，徹虛空落日寒。
蟬徑秋山古木風，沙明知遠火雲暗。
聽歸鴻游賞諸天闊，拈花一笑中。

王萃字秋史，號蓼谷，歷城人。康熙丙戌進士官成山教授，有二十四泉草堂集。

王貽上曰：秋史詩骯髒，有奇氣，不屑一語。雷同而趣味澄，真如晴沆之貫達，與其絕相似。雖忌者不能

不心折
其工也

深冬坐雨

一年行且盡雙足暫相尊
芋熟零星火門關冷落村
寒隨風勢闊泉赴雨聲繁
知識都無益茅堂謝屐痕

南園

何處竊筵有攸廬空存老樹
與情渠亂泉聲裏誰通屐黃
葉林間自著書草色又新秋
去後菊花爭放雁來初菘畦
舍北餘多少取次呼童一荷鋤

乙酉春日

山無歲暮庚辰雪柳少湖邊
癸亥春自笑空堂雙屐在不
知著出向何人

西河沿酒家題壁

松漿初壓自清渾
泥飲誰家老樹根
野水不知深幾許
半陂秋漲到柴門

擾擾京塵已白頭
眼中難遣是句留
日來何處無拘束
不在僧窗在酒樓

西山田家產一衛
田主奪歸不適于
乘有鄰之旁邑
姑借乘須臾往還
五百里祕不言主
鸞諸屠鄰聞
同往贖刃矣始言
衛狀感賦

有衛駸駸技千里
羈紲不受高雙耳
識其技者欲得之
千里之技死于是
嗚呼無用全天年
士信知己訕知己
浩蕩九衢十丈埃
龐然黑白行且止

沂水山行卽景

驢背寒銷破帽溫
鞭絲漸遠雪泥痕
亂山一路青駝寺
多

少東風到店門

海鏡庵與文悅上人茶話

佛火魚龍裏寒潮鐘磬邊數椽空所有一水息諸緣茶色
浮鮫市帆痕落水田爲言花事後時見蜃樓懸

九月十八日與杭客游干佛山余不至是山者十四

年矣

孤嶂孤花漫寂寥山靈應笑鬢蕭蕭僧殘老樹餘雙寺佛

冷空泉自六朝山崖像設鑿于北魏杖倚秋煙剛半起袖攜海氣未

全銷時歸自梅上者半月蒼然華鵲斜陽外可似西冷第幾橋

張謙宜字稚松號山農膠州人康熙丙戌進士有覲齋

詩沈鬱集

詩話山農少落拓以詩名中年折節讀書晚乃成進士不仕閉戶撰述年八十二自作傳續述其平生

擬贈程穆倩

誰能詩思入風雲，屈指南都老隱君。
脈望仙魚含斗氣，禹陵祕笈走龍紋。
山封乳洞還招隱，硯帶霜皴未可焚。
北地崆峒稱勁敵，也應心折水犀軍。

早發廢邱關

閣道苦淋雨，秋陰不肯晴。
曉渡廢邱水，兩腳四塞橫。
策馬上半山，親見白雲生。
竹木陡昏黑，蟲語空秋聲。
朝暎閃高頂，丹砂霜葉明。
白雲倏舒卷，上與蒼天平。
勞勞問前路，深媿山水清。

萬里橋上望浣花溪

逢人先問浣花溪，萬里橋頭路向西。
錦水細浮紅葉下，雪山高壓白雲低。
炊煙繞屋斜分竹，落雁將雛晚傍隄。
景物

曾經離亂後，懸知當日是幽棲。

中衛

山勢東南盡，河流西北斜。旋風高折樹，烈日下蒸沙。斥土無螢火，炎天有柳花。田淤香稻葉，水冷細芹芽。虎跡連荒草，駝鳴急暮笳。孤城開四術，板屋列千家。烽接臨洮塞，星衝北望槎。青酥三接酒，中酒名紫雪九蒸茶。邊茶皆蒸馬市雕題譯，浮屠馴象車。佛曾分舍利，龍亦載袈裟。禮視和親重，裝如報聘奢。降王收部曲，堠騎射亭鴉。四姓歸都護，三邊付押衙。秦兵方嘆喏，齊客正咨嗟。倚劍崆峒外，垂綸瀚海涯。壯心愁歲晚，秋色上蒹葭。

游蘭州五泉寺登鬘雲閣

曲檻排山骨，藤蘿四壁懸。苔青蓮葉下，樹老佛燈前。石透

雲烝窟泉深月在天半空聞妙梵孤磬隔溪煙

偶成

一月村中住心清學息機竹香人獨坐花落燕雙飛客莫
來投謁書常引下帷今朝晴更好自曬舊蓑衣

鞍子嶺

前嶺下陂陀驛路疑中斷峽轉地軸開山形又一變遵路
復前驅平蕪睇遠岸馭者正揚鞭岡阜重相見覆甌各低
昂菁蔥而峭嶠一笑下長轅徐行將過半迴首望復嵐煙
橫如匹練借問跨石鞍何如馬道棧自馬道驛至間王福
山如鞍者二十四處

蜀道畏途子
壬戌年所經

張璩字豈石號湘門湘潭人康熙戊子舉人歷官大理

寺少卿有石漁詩鈔

七日送梁大質人往肅州

七載分攜楚水濱，白頭吟苦見交親。
重逢人日題詩地，猶是天涯遠客身。
老去殘骸還作健，生來傲骨不憂貧。
行行盾鼻書還著，每把高文輒有神。

一卷光芒懷葛堂，讀書搔首望蒼蒼。
此生有願事千古，明日思君天一方。
金椀荒邱悲蔓草，鐵函良史凜秋霜。
岐陽此去應回首，記聽歌聲是楚狂。

汪繼燦字倬雲，號恬村，秀水人。
康熙戊子舉人，歷官吏科給事中。
有恬村吟藁、燕臺小草、視臺草、雙椿草堂集。

詩話倬雲碧巢戶部子，巡視臺灣，能舉其職，未復命，遭親喪，遽卒。

抵臺陽

奉命梯航賦遠征無多儼從旅囊輕乘風有願追宗慤擊
楫無勞羨祖生萬里恬波通貢道九天使節重專城水程
亦有郵籤報厯徧重瀛十一更

吳麟字子瑞號晚亭滿洲旗人康熙戊子舉人官內閣
中書乾隆丙辰舉博學鴻詞有黍谷山房集

雨

海氣東南來初望若積霧漸近色轉白濛濛勢散布次第
失峯巒微茫認林樹村南萬頃田不辨溝塍處廉纖方浥
塵已聽檐溜注隱几坐空窗澄懷擬禪悟靜課趁清宵一
卷水經注

戊申除夕

守歲京華夜驚心厯十年一鐙青似昔雙鬢白於前途抹

負佳日飛騰謝舊緣修名歎遲暮前路復茫然

入都喜晤諸同人小集絮影軒分賦

芳草殘陽百里程到來頓覺歲時更敢言陶令還歸社笑
說龐公又入城小閣風花新意致故人旗鼓舊縱橫酒闌
惆悵瞻明月落絮窗前雨乍晴

送夏鍾歸閩中

重來京國幾經春仍是翛然雲水濱卞氏璞完無用泣嵇
生龍老更難馴潮聲到耳驚鄉夢海味登盤憶故人衰舊
共憐今日會將離對酒淚沾巾

戴寅字純人號東溟滄州人康熙戊子舉人官定南知

縣有小戴詩草

詩話東溟爲裕庵庶常弟從兄入京師與吳荆山汪
武曹何屺瞻諸君游學乃大進詩宗晚唐尤工倚聲

鷹潭道中

荒雞催客夢侵曉踏征塵嶺路餘千折山車祇一輪帽檐
低礙樹潭影倒句人莫向東山去山靈笑此身

旅夜

孤館殘燈盡短窗落日斜河聲猶在枕客夢已還家身世
悲蓬轉風霜感鬢華六千歸路遠強半尙天涯

多景樓感懷

無端風雨滿山樓樓外長江忽倒流海氣乍沈瓜步樹潮
聲暗送秣陵秋六朝割據僧粗記一髮中原我欲愁往事
傷心還極目側身天地歎浮漚

許湜字澹園石屏人康熙戊子舉人官新興知縣有澹
園集

慎南勝境

振頓心神碎林巒忽霽顏天開松嶺小家近馬蹏閒落日
低平楚飛鴉度遠山昨宵風雨客黯淡宿黔關

山村

一徑松陰轉人家半嶺分溪聲常帶雨鳥夢不離雲野興
吟秋色閒情醉夕曛羨他田舍樂雞犬亦欣欣

覺羅固興額字怡亭號漫翁康熙戊子副貢襲雲騎尉
有漫翁詩草

淨業湖

水長疑無岸蒲深自有風鴛鴦閒浦外芰簪漾波中舊識
漁家子輕舟蓮港東何時此相見蓑笠出花叢

趙熊詔字侯赤一字裘萼武進人康熙己丑一甲一名

進士授修撰歷官侍讀有趙裴萼贗橐

月下觀惠山泉

此夜清輝好來尋第二泉影分揚子月光近太湖天古砌
涵秋色空亭帶晚煙半輪愁滴碎斜照石欄邊
爲愛團欒景重來翠壁間有心常對月無意復看山亭浸
寒光闊泉流素影閒徘徊九龍下疑是戲珠還

飛花

枉教辛苦費天工此別何由返故叢落水露泥判未得爲
君珍重舞迴風

惺忪無奈曉風催抵死空階去復回傷別有人慵未起又
隨蝴蝶夢中來

色香銷盡剩清涼羞逐東風度短牆斷送一春空愛好有

何心緒嫁王昌

地老天荒夢裏身東西未卜去來因不如一片隨流水猶

有漁郎解問津

繆沅字澧南號湘芷泰州人康熙己丑一甲三名進士

授編修官至刑部侍郎有餘園詩鈔

黃崑圃曰湘芷古詩上凌鮑謝

七言則元白錢劉抗行無讓

詩話沈確土序湘芷橫空硬語之作今集中祇存其半

疑湘芷自悔少作芟蕪獨多而惜收仲不及

見末由與之商榷觀此可知其致力所在矣

吳山山後觀亂石

披月訪名山雅具林壑癖歡攜盃寄人芒鞋穿亂棘造化

苦雕鏤皴皴詭裁織穿鑿已殊軌卷然罕定式性堅理以

曲膚皺體難直厥初誰磨礪崔嵬巧借力當時補天餘散

令絕壑殖神瀆流瀼瀼鐘乳懸湜湜象脰紛可寶猿尻杳
莫識幻作眠獅形猙獰險難涉雜糅如古篆蚪蚪獮劣崩
蟹眼光磨雲幽洞草生翦伸爪作之而權奇杳無極遠圻
巨靈跡神鼇齒旻旻滌若臙脂錢斑纈有萬億黝如醜婦
癯兒之不再憶黃若新鷲拳翡翠穿胸臆我歎魄磊多填
膺悲莫抑青精誰作飯令我好顏色擲杖歸空林厓柴閭
翁息

山雨乍霽由桃花澗厯天開巖覩禹碑望最高峯慨
然有出世之想

掬水浣山泥藤牀睡初覺空山一夜雨飛瀑干峯落起來
天宇清曉雲露斑駁澗水東西流噴珠滿大壑宛轉如游
龍天矯不受縛首尾一鼓盪鱗爪恣拏攫森森疊浪巖皴

麋瘦如削起伏生波瀾圓穹大包絡破碎瓊瑤瑛跳擲狙
猱攫趺坐作水觀清響聆竽籥喧極靜意俱冥心契寥廓
曳杖行前岡適與山僧約將窮最高峯搜奇出齷齪徑路
共猿爭上下似鳧躍厓花罨葛衣萐露溼芒屨枯藤立伶
俚倦蝶穿略約搖搖鳳折膝戢戢牛礪角攀躋高送眼崎
嶇危著腳山果團青紅酸甜漸可剝朋牽寄生草蔓引攝
生藥幽巖從天開化工巧鑿鑿陰磴竄鼯鼯陽竇捲亂籜
石軒久傾頽空壁就捫摸禹碑古篆奇鸞飄還鳳泊如從
响嘯過探奇自南嶽松風迴杖底人語出林薄絕頂望茅
茨天風隔蓬弱梵唄音琅琅木魚間金鐸振衣擬往從十
步三四卻開山思法度團瓢此棲託我生實鈍根踪跡判
塵濁僧寮一月住飲啄類孤鶴何當將家來鑿坏飽葵藿

夢與東坡言芙蓉城事甚悉坡公曰余前詩挂漏甚
多醒時追憶其語補之仍用原韻

芙蓉花開香青冥城中環珮聲東丁美人影入琉璃屏衣
衫飄紗光娉婷紅綃萬縷花煙青花枝歷碌鋪繁星浪言
服食能鍊形雲路千層誰所經荒唐此地棲真靈蒼蚪導
入驂雲輶或云主此石曼卿四天王映花芳馨觀文幾曾
歸紫廷恐是浪語朝士聽流傳遂曰帝所合城中設置何
軒櫺臨霞帳望不可憑丹樓漠漠風清冷丹樓失鑰夜不
扃瑤英偷入騎鸞翎丹砂鍊就驅雷霆歡攜子高坐中亭
元猿白鹿可結盟美人三十敲玲玢丁公吐語風觸鈴延
年倒卧醉未醒夢中絮語方吟嚼牀頭倒繫雙玉瓶百日
易過淚欲零塵埃一墮罡風腥素騾恍惚嘶空溟道逢東

坡訴飄萍恨不長年守黃庭下士瑟縮如焦螟且飲美酒
爲延齡莫恨孤凹與絕邢

惠山第二泉試武彝茶歌用商邱先生韻

寒泉九曲夢未到瑞草一束叢生巖氣蒼味厚色轉樸雪
煩驅滯心爲炊廟山蘿芥苦柔媚配此風格方相兼閩僧
前時裹寄我日夕蒸焙誇茅檐行纏南拆不忍棄驅屐白
碓標紅籤竭來試茶山水窟獠奴蒹葉勞包緘松響颼颼
風鼓浪泉音琤琮水拂簾雲垂綠脚滲遙碧香浮翠乳凝
空嵐泉清石白正映發夫豈尤物橫碾砭從來萬事尙標
格咀啜至味無人探斯水煮茶合第一虛評浪語空譏讓
是時山空巖骨露一塵不動含晶鹽餘甘漱齒喉吻潤恍
在武曲搗吟髯胸中腥腐滌欲盡茗柯妙理搜叢談

鮑山

鮑山山色如眉綠螺黛挽煙青簇簇洞中聞有了髻童手
把銅盃挹銀瀑金仙真誥落荒厓猛虎道旁時懾伏五色
肉芝供客啖駐景無勞更辟穀竭來山下悄無人閒凭一
杖桃枝竹不逢羽客佩方符但見歸農駕短犢山中居人
留我住地鑪火煥新篔熟我懶尋仙思采隱徑來就汝山
齋宿

游萬泉寺

果下趁暉曉來猛導我看山趣獨領東坡自是飛仙人籥
雲已過招提境支筇殿角神倍王握手山房冠不整高低
禾隴聞稻香曲折水田送秋影老柳衰荷水面亭大瓢小
杓松間瘦披榛闢莽尋萬泉山路崎嶇樂清迴旣無塵土

三丈撲況有水雲一千頃高人詎肯受羈縶野鶴尤能伸
脰頸就中何可少禪悅此地端須搖舴艋藕香一瓣心骨
清味似醍醐風趣永已見泉流白石根還看月出孤松頂
升高望遠腰腳健朵朵芙蓉臨倒影香林解帶復句留隨
意村醪雜山麩輞川後約和裴王窺園不待鶯三請

次韻和王令詒給諫移居

傍檐才妥玉丫叉疊架圖書得幾車亟遣長鬚新掃徑旋
教阿段手栽花較量酒戶尋張老

白詩酒熟尋張老

斟酌詩鄰近

孟家問訊一枝安穩未百年何事不浮查

紗巾敲落夜堂邊自在能參法喜禪熟睡乍回翻有味生
衣初試亦堪憐驚棲三面巢枝鵲長嘯一聲高柳蟬竹塢
鬪茶人散盡博山香燼半爐煙

重過封氏園飲矮松下偕查夏重錢綱庵顧俠君作
婆娑偃蓋一杯前閱盡滄桑五百年謾謾濤聲涼欲雨茸
茸針刺密無天金仙換劫長如此銅狄看人亦可憐貞白
先生竟歸去得聞長挂杖頭錢

熊務先自滇中來相聚東湖今歸涿鹿賦此奉贈兼
懷六觀章之兩前輩

碧山學士久焚魚愛子聲華冰玉如章貢煙波遲笠屐點
蒼雲氣接衣裾空江落木將迴棹白髮青鐙正倚閭高適
陳登風韻古沙頭執手野踟躕

謝敷宅

遙天笙鶴萬峯青石厂周遭霧雨溟今日吳中高士少不
愁月犯少微星

戴名世字田有一字褐夫號憂庵桐城人康熙己丑一

甲二名進士授編修

詩話田有晚年登第以南山集與大獄伏法著書銷毀後同族戴存莊補輯文集至光緒初始刊行文有逸氣在桐城派中自成風格不以詩名集有齊謳集自序久佚不傳惟爛柯山記中載二絕可見其鬱勃不平之氣

題爛柯山石壁

採樵偶向洞天行一局中間世已更不看仙人貪采藥
模糊何復覓前生

謫向塵寰病未瘥同班仙侶近如何語君奕罷朝天去爲
謝狂生罰已多

趙國麟字仁圃號拙庵泰安人康熙己丑進士由知縣

官至文淵閣大學士有雲月硯軒詩彙近游草

詩話拙庵以丙戌捷禮部試至己丑乃應殿試初介
長垣不數月庶獄悉就理歲饑發粟怡賑河倫親督
築隄禦水屢遷長蘆巡使而操尤著遂陟
封圻登臺閣正色立朝侃侃如古大臣

初晴再同健庵游紫陽登瑞石過大道觀至鍾翠亭
而歸

登山如讀書深造始得旨草草一登臨鹵莽涉獵耳昨日
紫陽游風雨促歸止歸卧怨夜長推窗測朝晷曛曛日初
升快意成狂喜策杖到山椒緩步窮其美石色映晴旭蒼
翠徧肌理峯峯透嵌空寸寸簇羅綺舊境獲新遇石壁勒
圖紀按圖搜名勝七八得所以江水淨如練湖光明如紙
左顧列萬瓦鱗鱗集眼底乘輿西北游桑柘徑迤邐大道
存古觀巒岫疊伏起吳山此一隅約略窺原委茲游不草
率可免昨日恥

古風

亭亭雪裏松拂拂風中柳皎月未沈樓紅日已盈牖閨中
感歲華紈素不離手不作嫁衣女願爲織機婦豈不苦力
作賤妾意所守

岱陽有古柏柯榦堅如石衆鳥巢其巔鳳凰來作客翾翾
羽儀輝翱翔雲漢薄飢飧玉山禾渴飲伊與洛聖世待來
儀網羅誰能索亭亭梧桐枝鬱鬱高岡宅長鳴不顧返九
州若咫尺君看迎陽雁常爲稻梁迫

水簾洞

銀河西瀉散珠房東澗鑄經滿石梁遙憶匡廬千尺瀑何
人爲築讀書堂

阿克敦字冲和一字立恆又字恆巖滿洲旗人康熙己

丑進士官至刑部尙書協辦大學士加太子少保諡

文勤有德蔭堂集

詩話文勤初得策受知景陵學問聲名兼邀親許
迨雍乾之際出佐戎旃遠持使節建固圉安邊之策
遂陟正卿襄大政尤以厚大清介敗文成勳業之盛
相傳文勤嘗燕居文成侍立文勤問汝為刑官治獄
宜何如文成對行法必當其罪罪一分與一分法罪
十分與十分法文勤大怒謂罪十分恰之五六已不
能堪而況其盡且一分之罪尚足問耶其持大體務
遠歎卽是言可見仍世韋平偽時韓范非偶然也詩
質實伉爽如見
正色立朝風度

讀漢留侯唐鄴侯傳

大道有消長哲人在乘時身心役於物出處失其宜緬彼
子房賢悠然使我思博浪報韓仇英聲震八陲密謀參帷
幄摧項如嬰兒成功以告退願與赤松隨從容儒者風高
踪誰可追長源曠代合白衣帝者師二京恢復策千秋竹

帛垂讜議寤人主骨肉無猜疑遐情寄放達山巔與水湄
漢唐兩先生令聞善保之託言養生術羅網安所施神仙
亦杳渺功名不可羈遺編覽夏日綠葉亞槐枝

吳義民尋弟詩

兄弟他鄉遇關河故國非幾年悲遠別此日更相依暮雪
迷山徑邊風凍日暉人歸甯古塔和氣滿庭闈

卽事

宏濟院邊催曉發慕華館外駐征鏢鴛班排立虔瞻拜五
色天書下絳霄慕華館距城十里國子
出城至此行抑勅禮

麗人武事自稱雄短劍寬衣襯小弓馳驟憑他執鞭者空
傳果下是朱蒙朝鮮稱三尺馬爲朱蒙所乘果下種
馳驟一隨步從弓劍最小武事下矣

結綵高懸崇禮門肩與雲擁一城喧避人清道迎天使引

入藩宮禮更尊

早設重茵便殿中升階就位列西東向臣頻問天顏喜心
感皇恩異數隆

準噶爾歌

噶爾丹策凌之
部塔名準噶爾

緬惟有元主中夏版圖日拓朝外夷西塞四種厄魯特駝
馬牛羊分牧之種類之中準噶爾善於收馬日蕃滋部落
酋長謀勤最屢降丹書晉太師元祚寢衰帝北狩一傳再
傳不自持額參強盛收蒙古土木之變是所為額參太師
者噶爾丹
策凌之先祖明正統之蒙塵乃額參收蒙古以後事今
蒙古紀載甚詳明史曰也先蓋漢譯番言額參之誤也元
帝子孫號戴廕翦伐厥後威更施嗟彼喀爾喀實乃有元
之本支叛虜不臣肆侵擾渙散奔走何慘淒 聖祖納降

誅有罪噶爾丹滅無子遺兄子策旺遜西域

策旺阿拉布
坦者噶爾丹

之姪噶爾丹娶其母而殺其弟故遜走
 西域收敗亡之餘率取回地以成國
 苟安於世飾詐欺
 子濟父惡惟恃遠噶爾丹策凌者策姚梁小醜亦太迷我
 武維揚殲逆寇年來膽落望風靡將士鼓勇思奮擊直搗
 其巢及此時帝曰普天之下皆赤子雖在殊俗忍視歧按
 兵不殺俟悔悟予以自新一介馳好生之德洽蒼昊蠢爾
 悅服中心移表上謝過遣貢使臣得遭逢千載奇天時人
 事詳審度臣敢拜手以獻昇平詩

呂謙恆字天益號澗樵河南新安人康熙己丑進士改

庶吉士歷官光祿寺卿有青要集

詩話天益成進士後其子樸巖三十餘年蓋登第已
 甚晚早歲以詩稱詠秋夕云月遲羣宿動天河一峯
 孤其兄元素少司農大賞之元素官甯鄉日即為天
 益刻青要集其後同官京曹兄弟唱酬詩乃益工
 宿隴州龍門洞

出郭沿清流登高陟曠坦遠峯翳輕陰奔峭若在眼望煙
指衡茅緣岡上修阪入峽未卓午雲昏晝疑晚冰泉石齒
冽陰飈林鬣卷移時聞奔雷循崖見曲棧石色混空碧青
蒼互瀾滿飛夢赴巖敲浮杠憑索轉渡澗更奇絕危削愁
步蹇疑有避秦人或燕茲洞館樓卧聽崩洶欲寐還屢輾
松窗片月明捫星信非遠

懷浦大雲曠

曠然念江海所思何由見人生各有營况復隔鄉縣漢水
一爲別畿南再識面悠悠二十年星霜嗟流電京華厭旅
食歸卧滄海旬念君無舊業躬耕亦虛願清宵夢悄悄何
以明縉綬蛟龍踞波濤魂來不敢盼垂老阻良覲生死遙
難辨爲儒寡世用五字名空擅天地何寥闊吾子竟貧賤

游石淙

亂山砗磲疑無路披盡蒙茸向煙霧澗水淙淙忽有聲崩
崖石罅相迴互其下深潭一千尺俯視蒼黑不敢立夜半
常聞雷雨鳴潛蚪跋浪時出入激湍噴薄結輪風虛洞盤
回若履空靈怪應從天地闢缺疇不與斧鑿同捫壁穿雲
歎奇絕古碑剝落苔蘚色妖后當年駐翠華詞臣扈從爭
珥筆嗟乎石淙多此名箕山潁水空相惜十年真負海嶽
志徙倚高天生遠思歸來月照松窗明夢魂猶繞雙峯翠

漢南送張二慶餘歸吳門

黃山驪嶺起嵯峨萬里征車此再過愁裏關河勞遠望客
中風物易悲歌煙殘古戍行人少日落邊城戰馬多歸去
吳門秋雁候音書應寄到岷嶓

送杜樊川之石門主簿任

十載詩名滿甸畿高才不厭一官微
驪駒聲裏難爲別黃葉樽前不定飛
到日江城閒簿領初冬驛路冷征衣
浣花格律何清健此調於今和者希

送內弟王擬山歸里

觸暑驅車亦太勤十年同氣地常分
人當老至難爲別雁到秋深不可聞
蘆水風高吹遠岸房山雲霽見斜曛
歸塗覽勝題詩處白露丹楓倍憶君

呂耀曾字宗華號樸巖河南新安人
康熙丙辰進士由中書官至總督倉場
戶部侍郎有橫山集使黔草

宿聖感寺

太行蜿蜒千餘里重氣磅礴鍾林泉
京城之西尤佳絕萬

里綿互環幽燕我聞聖感名已久欲一登臨愁攀緣重陽
雨霽後三日桑乾水淺流濺濺公餘策蹇訪般若鼓舞直
上如登天松風謾謾時入耳紅樹青岑相新鮮石徑法悔
培塿小西望惟見山聯翩上方更忻逢惠遠談禪坐久望
言詮知我性喜弄文墨開篋示我詩千篇方袍有人善知
識二十八紀從茲傳散步西軒窺深雪水湧乃在山之巔
烹茶細品味甘冽習習風生超雲煙東上平臺臨皓魄山
高星動冰輪圓元規去此幾千里寒氣侵人身欲仙下宿
方丈聞鐘磬夢魂彷彿逢偃佺

呂憲曾字章範河南新安人康熙戊子舉人官澉浦知
縣有舒亭詩草

送十二弟宗則之祥符教諭任

西風吹鴻雁飛鳴過園林嘹唳入我耳淒淒動我心我心
胡爲動爲言別弟昆弟昆共一堂吹簾和以填歲時聯宴
會伏臘共明禋禮貌無雕飾性至情自真中年紛仕宦南
北歎離羣憶昔同就傅受業有先民戒我端趨向教我以
成人悠悠四十年玩愒負師恩賢書雖濫厠詩書氣未深
子今爲人師德成必有鄰黌宮育才地梁臺多嘉賓行矣
敦教化努力振斯文以此勤職業應知吾道尊我行悲遲
暮宦蹟等浮雲垂老仍墨綬勇退是夙因白頭期聚首天
涯各愛身

方式濟字沃園桐城人康熙己丑進士官內閣中書有

陸塘初稟出關詩

詩話南山集補作沃園自知不免多方以脫宗人尋
隨父同徙塞上定省外獨處一土室著書不輟與父

同卒遼東子恪敏公觀承孫勤襄公維甸兩世節鉞
相承方氏之廢興洵不可測矣詩摹昌谷不僅形似

城上烏

揚州城上烏，傍晚城樓歇。蔽日飛啞啞，天光乍明滅。揚州
城中百萬戶，香塵細碾平山路。侑酒牆東倡繫馬，街南樹
前朝勝事稱紅橋。珠簾畫槳聞吹簫，一夜神兵渡淮水。礮
聲震動無堅壘，血濺孤臣舊戰衣。降旗不見城頭起，雨溼
沙黃鬼晝哭。至今豐草埋遺鏃，飢烏不識太平年。猶想城
頭啄人肉。

玉笛引

遺釵斷髮填宮井，擬笛魂歸春苑影。牆外無人三兩聲，碧
墀鋪月梨花冷。記得西園侍宴時，君王愛度涼州詞。長調
穿風無氣力，銅盤露賜傳催急。白楊瑟瑟迷金盃，纖塵光

掩昭華琯歌臺小妓慣偷吹誤瀆殘脂口香滿蜀山破夢
漏丁丁不敢牀前自報名迴廊弓印驚鸚鵡夜夜親來續
簫譜

五葉詞

碧山瑤草驕蘭荃鬢鬢五葉光芊綿厓敲谷轉箭牙密土
膏放煥龍耕煙靈根不死千年在留與丹臺助嵐彩金骨
仙人石鼎漿一呷能令壽山海耆峯渺渺軒轅邱地脈沃
盛徵天休上黨新苗雲液薄深林誰復窮冥搜兔日已收
紫芝滿玉桃樹下嚴司管青毛使鳥罷銜符兒戲東方欲
搗腕法星奏補三章約輕死空求延命藥斫桂雖無繡斧
加蹒跚已折元烏腳天外九衢春瑟瑟六丁直日關梁塞
溪畔胡麻夜起塵落魄愁來赤松客

望見卜魁城

一片沙昏數尺牆，斷埤煙景亦蒼蒼。怪來戰馬防秋地，說是書生送老鄉。五十三亭燕樹隔，六千餘里楚天長。勞肩息後尋詩料，雁月笳風拾滿囊。

何世璣字澹庵，一字坦園，號鐵山，山東新城人。康熙己丑進士，改庶吉士，授檢討官，至直隸總督，贈禮部尚

書

詩話雍正間督饒兩淮必極一時文選鐵山尤著廉聲超擢撫黔內貳西曹歷吏戶二部復出督畿甸旋卒於官少受業於漁洋撰然錄記聞述論詩之旨一歸於雅正

漁洋先生招同門諸子雅集以五月賣松風人間本

無價為韻得價字

烏起星欲忱塵飛月當下，涼颺挽不留炎氣紛相射。比來

奉清言卜晝仍繼夜髣髴長松裏萬壑秋濤瀉風生兩腋
間蕭然不知夏吹物豈無心報瓊詎論價以此託心期登
仙比羽化又如願長康佳境得食蔗粲然謂熱客腐鼠何
足嚇

東阿道中

雉麥剡剡翠欲齊四圍山色傍人低花明柳暗前村路布
穀春鳴日正西

芮復傳字宗一號衣亭寶坻人康熙己丑進士歷官浙

江溫處道有衣亭詩草

詩話衣亭自中書改令錢塘翁然稱循吏擢守溫
州五年以治有成效就除溫處道詩蒼秀有骨格
感懷

回翔浙水徧西東三十年來夢覺中拄笏看山真落落抽

帆到岸太恩恩靈龜以甲難辭灼慧鳥能言枉入籠縱有才華宜自惜當春試看擘花風

朱陵洞

朱陵洞口下飛流百尺珠簾挂未收仙女晏歸深夜捲碧蘿爲帶月爲鉤

聞雁

平沙淺渚耐寒霜叫破燕雲憶斷行莫怪蘆汀眠不穩衡湘雖好是他鄉

周人龍字雲上號躡滄天津人康熙己丑進士歷官江

西督糧道有居易堂詩藁

舟中寄衣亭五弟

宦海分飛各一方西江離緒更茫茫南看桂嶺雲千疊北

望燕臺樹幾行獨雁天涯春信杳孤舟江上晚風涼年來
漂泊同鷗鷺翹首鷓鴣萬里翔

晚晴簃詩匯卷五十七終